

STAT. IV.

De Officio Magistri.

Quoniam Magistrum vigilantem esse decet, velut oculus in corpore, qui reliquis corporis membris diligenter prospiciat;—Statuimus et volumus ut Magister, qui pro tempore fuerit, cum omni sollicitudine præsit, Socios et Scholares Collegii aliosque quoscunque in dicto Collegio commorantes moneat, increpet, arguat, obsecret, ut singuli suas partes et officio præsentent.

Ad hæc statuimus et ordinamus, ut Magister ipse, vel substitutus suus, una cum Senescallo ad hoc munus annuatim deputando, de triennio in triennium supervideat domos, tenementa, ædificia, terras, cæterasque possessiones Collegii prædicti, et ita diligenter observet quæ reparanda et ædificanda fuerint, sive per Tenentes et Firmarios, sive per expensas Collegii, ut in nullo eorum ruinæ, destructiones, vel deteriorationes reddituum, aut firmarum diminutiones, ob defectum debitæ supervisionis accidisse inveniatur.

Præterea volumus Magistrum prædicti Collegii terras aut tenementa ulli locare sine consilio et consensu majoris partis Sociorum; aut bona Collegii mobilia vendi quovismodo absque expresso consensu Magistri et majoris partis Sociorum; aut possessiones et bona immobilia dicti Collegii permutari vel alienari, nisi propter magnam utilitatem vel necessitatem vel Collegii a Concellario vel Procancellario, dicto Magistro, et octo Sociis ad minimum approbandum. Et si quid locatum vel dimissum fuerit per Indenturam, prius scribatur in Registro ad hoc deputato.

STAT. V.

De Qualitatibus eligendorum in Socios.

Statuimus et ordinamus quod in electione Sociorum Collegii prædicti Magister et Socii ejusdem Collegii, qui per scrutinium Socios co-optant, eligant simpliciter meliores, non habendo respectum ad aliquam affectionem carnalem, nec instantiam seu requisitionem aliquorum, aut procuracionem, sed quos cognoverint esse honestos, castos, humiles, pacificos, et modestos, graduatos, et qui proxima determinatione post electionem suam actualiter procedant.

Volumus etiam ut in electione Sociorum talis ratio habeatur, ut eorum tres ad minimum sint in Presbyteratus ordine constituti. Socios etiam omnes Magistro volumus et ordinamus, una cum cæteris omnibus in dicta domo commorantibus, subesse, et eidem in licitis et honestis, pro statu, utilitate, et regimine dictæ domus salubriter in omnibus obedire.

STAT. VI.

De Electione Sociorum.

Electionem autem Sociorum ad hunc modum fieri volumus. Sodalitio jam vacante, Magister, ubi ad utilitatem Collegii prædicti conducere judicaverit, Socios in villa præsentibus convocandos curet; quibus sic convocatis, assignabit diem et horam electionis futuræ, quam volumus post hujusmodi convocacionem omnino ante diem quindecimum fieri; Socios etiam absentes, quantum fieri poterit, de die et hora electionis futuræ certos faciat. Quo facto, Magister et Senior Socius tunc præsens vel in Sacello vel in conclavi Magistri seorsim a cæteris Sociis stabunt, et primo suffragia sua in scriptis ferent, deinde reliqui Socii in ordine omnes sua quisque vota similiter in scriptis ferent. Et in quem ex omni numero sic præsentium major pars (vel etiam dimidia pars, si in ea includatur Magister), consenserint, is pro

Socio habeatur. Quod si vota alio quovis modo divisæ fuerint, tunc volumus ut bis aut ter infra triduum ad eligendum conveniant. Et si in tertio scrutinio non possunt juxta modos præscriptos consentire, tunc ille ex nominatis per Socios in Socium eligatur quem Magister nominaverit. Proviso semper quod Magister et sex Socii ad minimum intersint hujusmodi electioni, si tot Socii eo tempore superfuerint. Proviso etiam quod sodalitio vacante, hujusmodi electio semper intra annum post vacationem ejus fiat vel saltem ante diem primum mensis Maii post annum a tempore vacationis finitum proximo sequentis.

STAT. VII.

De Admissione Sociorum.

Hi autem Socii singuli in admissionibus suis talem præstabant professionem ut sequitur.

Ego (M. N.) profiteor me veram Christi religionem secundum regulam et doctrinam Ecclesiæ Anglicanæ ex animo amplecti; Auctoritatem Regiam in omnibus hominibus et causis ejus dominationis summam, et externorum Episcoporum Principum et Potestatum quarumcunque jurisdictioni nullo modo subjectam æstimare. Ita do fidem.

Profitetur quod observabo omnia Statuta et laudabiles Consuetudines Collegii nostri quamdiu in eo versatus fuerim. Et quod Magistro sive Custodi hujus Collegii obediens ero in omnibus licitis et honestis. Et quod Collegii honorem et utilitatem, quantum in me est, meo consilio et auxilio juvabo. Et quod secreta Collegii, quæ in damnum infamiam sive præjudicium ejusdem cedere possint, nulli extra societatem revelabo, nisi legitima auctoritate coactus. Ita fidem do.

Qua Professione præstita admittatur a Magistro sub hac forma verborum quæ sequitur: Auctoritate mihi commissâ admitto te Socium hujus Collegii in nomine Patris et Filii et Spiritus Sancti. Amen.

STAT. VIII.

De Residentia Magistri et Sociorum.

Statutum est ut Magister Collegii resideat in dicto Collegio singulis annis per spatium sex mensium inter primum diem mensis Octobris et ultimum diem mensis Julii conjunctim vel divisim, nisi rationabilis causa ipsum excuset per majorem partem sociorum approbanda. Quo tempore volumus illum præsentem esse in Collegio, nisi gravis infirmitas, regia, aut magna et urgentia Collegii negotia impederint.

Socio extra Universitatem abesse permittatur, si Magistro postulanti causam absentiæ justam et honestam reddiderit; ita tamen ut, quodcumque Magistro propter Collegii commodum et utilitatem visum fuerit, redire teneatur. Nemini autem Sociorum munus quodvis intra Collegium gerenti, abesse liceat, si vel Magistro vel majori parti Sociorum absentia ejus Collegio detrimenti causa videatur.

Si quis Sociorum revocatus in Collegium a Magistro non redierit; vel si quis, munus gerens, revocatus in Collegium vel a Magistro vel a majore parte Sociorum non redierit, a Collegio et omnibus ejus emolumentis amoveatur et pro non Socio habeatur.

Proviso semper quod Magister diligenter caveat ne omnes Socios simul et eodem tempore in ipsius absentia extra Universitatem abesse permittat, nisi in gravi pestis infectione, quæ etiam tempore de Collegii securitate et custodia diligenter provideatur.